

■ TRIBUNA POLITICA

Strategia da proprietad per Repower dat trasparenza e segirescha nos interess

DA MARIO CAVIGELLI,
CUSSEGLIER GUVERNATIV

Sco interpresa d'energia grischuna independenta che s'orientescha cun sias activitads viers l'entira Svizra e viers il mund presta la Repower SA ina contribuziun essenziala egl interess dalla politica d'electricitad grischuna. Ella ha perquei ina gronda impurtonza per l'economia publica, per la politica regiunala e per l'economia da finanzas. Quella situaziun favoreivla per il cantun e per las vischnauncas sto vegnir garantida era el futur aschi bein sco pusseseivel. En quei connex duein vegnir risguardai era ils svilup actuals dall'interpresa e dallas cundiziuns dalla fiera.

Per quei intent ha la regenza concludiu ina strategia da proprietad per la Repower SA per ils onns 2014 entochen 2017. En quella ha la regenza fixau las finamiras individualas da proprietari ord la posiziun dil cantun sco in dils acziunaris principals. Ella ademplescha tras quei sia incumbensa e sia responsabladad egl interess dil cantun el rom da sias cum-petenzas sco era en accordanza cun ses dretgs e sias obligaziuns tenor il contract d'acziunaris vertent denter il cantun e l'Axpo



SA e risguardond ils dretgs dils ulteriurs acziunaris e da participonts.

Sin fundament dils puncts centrals e las finamiras strategicas fixadas vul la regenza porscher – ord vesta dil cantun – premissas optimalas per che la Repower SA possi haver era vinavon success ell'economia d'energia e schaffir ina plivalur per las proprietarias ed ils proprietari. La strategia da proprietari rinforza la qualitat particulara dalla Repower SA sco schinunnada interpresa d'energia ch'ei integrada verticalmein ella fiera. Tenor quella duei la Repower SA puder esser vinavon activa en tut ils secturs dalla cadeina da valorisaziun dall'economia d'electricitad, dalla produenziun d'electricitad sur il commerci e la distribuziun entochen e cun il provediment d'electricitad.

La regenza colligia cun la strategia da proprietad plinavon il clar confess che la Repower SA duei – sco interpresa grischuna egl interess dil cantun, dallas vischnauncas e dalla populaziun – era mantener e rinforzar egl avegnir sia relaziun dominonta cul cantun Grischun. Principalmein duei la Repower SA mantener vinavon sia sedia principala el Grischun ed ina ferma preschientscha ellas regiuns, ellas qualas ella ei gia oz engaschada. La Repower SA vegn aschia era egl avegnir a mantener sia impurtonza economica e sociala ellas regiuns cun schaffir posts da lavur e cun far investiziuns.

Per consequenza dalla votaziun dil pievel dils 22 da settember 2013, nua che l'iniziativa da cotgla ei vegnida acceptada, spetga la regenza denton era dalla Repower SA ch'ella separticipeschi buca pli vid societads cun ovras electricas da cotgla. Ultra da quei duei l'interpresa sortir a moda ordinada e ligionta dil project concret dalla ovra electrica da cotgla Saline Joniche en Calabria. Tenor l'opiniun dalla regenza ston las stentas corrispundentas vegnir prendidas a mauns immediatamein e seriusamein. Aschia vegn la voluntad exprimida dil pievel realisada.